

呂
子
評
語

呂子評語正編卷四

楚邵後學車鼎豐雙亭氏編次

論語學而第一

子曰學而時習之章

髻髻就傅。開口便能問學。是何物。所學爲何事者。知其將來必能渙然冰釋。怡然理順。蓋此時已種根也。

凡提一字以貫通章。註中初無此意。卽屬萬曆以來講章杜撰章旨。皆亂道也。若此章學字。於理却合。註雖不提明。亦隱然脈線。蓋學字原無所不貫耳。若謂非此不可。則又不然。

學字可貫下。悅字却貫不得。以悅字作線索。也只得憑君說。畢竟牽強。講到不慍。仍是時習也。只得憑君說。畢竟支離。

明分三不亦。如何硬要併攏。

須是聖人說底道理。自可包括賢人步位。若移做得賢人說底。便到不得聖人微上下境界。時文於首節止作誦讀話頭。次節止作交遊話頭。末節止作士不遇話頭。此是低秀才胸中打論耳。於聖賢何有。亦有寫作孔子自述傳贊者。更謬。此不是聖人自敘。

首節

吳爾堯文。古人已往而已。復不學可乎。則理在天地間。有時而不流行矣。**評**。天地如何有不流行之理。只我便是天地不行之物。**文**。設使前無古人而已。竟不學可乎。則理在吾心。有時而不流行矣。**評**。此意更激昂。流行便悅。

學字訓效。朱子謂所包甚廣。兼學問思辨行五者。未嘗專主讀書而言。讀書乃學中一事耳。時解每以稽古蒞誦典籍等了却。此

正是朱子所闢爲詞章訓詁之學。而陽明反以此誣朱子者也。昔友與余論集註曰。學字被文公註錯。竟在讀書講義上看。豈不誤耶。余誦此節註答之曰。後覺效先覺之所爲。何嘗專指讀書講義耶。乃憮然置去。吾友亦好古能文者。蓋其時浸淫于良知之習。以集註爲洪水猛獸。士大夫皆以不看朱註爲高。而篤信邪說所云硬坐朱子之罪。謂但知以讀書講義爲學。而爲時文者。亦以爲遵傳註必當云爾。故遇學字定以稽古博聞詩書誦讀爲言。此攻者固不知。守者亦不知也。誠令細心讀集註章句。則豈敢爲此誣罔之論哉。近日論者乃云。作文須依註。講學則不可依註。以講學之說論文則非也。夫作文所以發明孔孟之言。此而不可用講學之說。則所講者何學耶。固不辨而知其所主者之必邪說矣。

陳際泰文學者授于人者也。一刻或可領其傳。至如其人焉。則已難矣。評學字欠的。實下落。能領其傳得矣。無必如其人之學也。評學者效于己者也。一日或可得其概。至忘于己焉。抑又難矣。評忘于己又不是。人要說得理高。輒下箇忘字。其實聖賢從無此說。評習于入世者爲日長。習于返本者爲日短。豈有幸焉。評此二氏之言。聖學入世卽是返本。文食息起居。有至理焉。粗而粗之。精而精之。則學外更無他用之時。評此義是。無非學也。只是行習而不著察。卽非學耳。文子評此文雖王瞿復生豈能復議。取其詭俊。遺其正大。得大士之皮毛耳。評理解駁雜。王瞿不至此也。安得無遺議。卽千子謂此文有周有孔有朱有陸。一有陸。則周孔朱俱無有矣。謂之正大。吾不信也。

門人問學之言效。如其人非效乎。曰。效其人是也。以如其人爲至。

古未之有也。孔門諸賢誰不效孔子。以顏子爲至。而顏子未嘗如也。有若似孔子矣。而反不及顏子。曾子未嘗如孔子。而獨爲得傳。故非不欲如之也。無此事焉。故不以爲至也。

得傳。合心與道而蚤夜孜孜焉。謂之學。**中**。閒儘有在。怎便說个合。覺以覺乎其心也。**謂**。覺字是本註。但道个覺心。便入邪說。

儒者之所謂覺者。指此理。外道之所謂覺者。單指心理。必格物致知而後覺。所謂知性知天而心乃盡也。覺心則必先。去事理之障。而直指本體。故以格致爲務外支離。然自以爲悟本體者。于事理究竟膠黏不上。於是後來陽儒陰釋之說。又變爲先見本體而後窮事物。自以爲包羅巧妙。不知先約而後博。先一貫而後學識。乃所謂支離務外。聖門從無此教法。六經具在。可覆驗。

也。

而字一斷。最重。時習兩字各有義。混淪不得。

朱子謂第一句五字。雖有輕重虛實之不同。然字字有意味。有下落。今按學時習三實字。與而字一斷。人所共曉。惟之字指所知之理。所能之事。人都忽略。不知時習箇甚。

說字實境真味。只在上句中領會。若脫却講。便是拈花微笑。且喜大事了畢。非聖學之說也。

學之傳。傳于古今人所自有之心。非由外鑠我也。故如芻豢之悅我口。若道卽心是學。便不是。

說字種根。只是此心此理。

學本可說。是劈頭道理。

學只是本分事。世人鮮知。那得浹洽也。

說卽在時習內。

本無而有。驟見之說。本有而有。居安之說。此二意。但從讀書時。貼出來。便覺字字。雖入人心裏去。況學又不止讀書。

纔學便說。其說尚淺。纔說愈學。其說乃深。

只是不歇手。自然日新。

有朋自遠方來節

黃澤曰。大羣不可一日渙也。統系分裂。人材日蔽于下。志士憫焉。一旦以誠感之。而知此理之灼然可悟。則人心正矣。**邵**單說。禪悟則人心不正極矣。**呂**異端之學。譎誕乖離。蓋有名足以動天下。而實不足以孚鄉邦。力足以召朋黨。而行不足以信家人者。彼有聞而來。亦將有見而去也。**評**開堂說法。徒滿天下。得毋有惕于斯言。

有朋句。定連上節說下。不爲套引。正恐連上節說來。尙是虛位。必問其所學何學。則其朋爲何朋。假如爲禪宗之學。則必有禿丁之朋。爲修鍊之學。則必有爐火之朋。爲縱橫技擊之學。則必有亡命無藉之朋。各學中支派不同。朋亦隨異。然未有不相應者也。陶菴充有聞而來。有見而去。亦尙是說古者事。若近日講學。以勢利相成。以詐僞相用。君子樂得其官。小人樂得其欲。一道同風。爾知我見。何須迴避。故并無是事也。

人不知而不愠節

不知隨地說。不專主行藏。

人不知地位甚高。不是歎途窮事。

不愠本領須說得不同。是成德至處。

有子曰其爲人也孝弟章

上節就凡人虛論个道理如此。下節言君子所以專用力于孝弟之故。未嘗黏煞兩箇人說。亦未嘗有上爲質而下爲學意。此皆講章說夢耳。

兩節原一氣貫注。不過因淺觀深。就小指大。總講道理。如是不曾分兩種人事也。自講說強分上節爲質。下節爲學。轉生支離。于是君子句要過文。孝弟句要過文。大都剝肉成瘡。愈講究愈不明白。

金仁山謂前節以質言。後節以學言。中二句泛言。亦是強分枝節。看來只大槩論事理如此耳。若云但看凡人若孝弟。便不到犯上作亂。不犯上作亂。便是仁化氣象。所以要做仁民愛物工夫。必須在親親上做起。如此看來。原是一氣說下。只是前節在凡人一人身上推論其理。故孝弟與仁都說得淺小。後節就道理

推論到盡處。不但仁字說得廣遠。卽孝弟亦說得完全耳。

或問說者謂上節以質言。是凡人之孝弟。下節以學言。是君子之孝弟。闕之者又謂首尾孝弟相應。無犯亂不仁。卽是爲仁。不得硬分兩項人看。二說如何。曰。前說始于金仁山。理亦無誤。但質學二字下得不當。便成滲漏。上節是設箇假如。就現成人身上指點。此孝弟說得輕。說得小。也不論質。也不論學。如云。大凡孝順之人。決不爲非。下節卽根上節推出。此孝弟說得重大完全。只指點道理如此。質字固不相干。卽學字亦言外意。如云。不要小看了孝弟。乃是爲仁之本。則不可不務學意思。又在此句下。語氣未及。故仁山硬分質學。誠有病。至上節現成假如。自然指凡人說。下節講道理。自然指君子說。卽不犯亂。亦與爲仁不同。不犯亂。只就凡人一人身上說。若爲仁道理甚大。仁民愛物參。

贊化育都在裏。非君子誰與語此。

首節

此節孝弟。是指成質言。其爲人也。四字。是虛語。與葉公章其爲人也。文法一例。猶云這箇人一向也。此爲字。與爲仁爲字。虛實不同。人字。與仁者人也。人字。又大小精粗不同。時文每每牽合爲仁。卽爲人。不但不識爲仁道理。并不識爲人文法矣。

君子務本節

或云務本不連上文最難。爲仁之本。不旁及民物最難。直是胡說。謂務本句不可遽出孝弟。則是。非謂不可連上文也。至謂爲仁不及民物。則爲仁說箇甚。此等評論極不通。極誤人。須闕除之。上二句畢竟是泛言凡事。不則下二句爲屋下之屋矣。

陳龍文

道非本不生。而本之大小則異。故或以彌綸天地而或

僅以兢兢奉上法也。**譯**數言有名理。道隨本爲大小。卽見上下兩節分義。

洪興祖有如其爲人也。如吾所云孝弟也者。云云。**譯**末兩句只講道理。不在人身上說。者字不指人。孝弟也者。不但不粘凡人。并不坐定君子。文之墮義。只爲眼落在爲人二字上。不知上節其爲人也四字。也不過說假如這箇人云爾。人字固非仁者人也之人。爲字亦非著力字也。

天下人都不犯上作亂。此是何氣象。故爲仁二字。只在上文涵泳得之也。者其與神理自然意味深長。蓋此節是足上語。非推開語也。

孝弟因人都淺看。此正要人深看。人都輕看。此正要人重看也。者字自有觔兩。

極言孝弟之量而及于爲仁。非爲爲仁而推其本于孝弟也。時文好張皇仁字。以孝弟轉合。失其義矣。

或云此只是反覆申論孝弟。不重爲仁。不宜實發。曰實發得爲仁廣濶。則孝弟之用大實發得爲仁之本親切。則孝弟之理精正。爲申論孝弟。故不得不實發耳。

爲仁之仁。小言之。卽不犯上作亂。廣言之。至於變時雍。上下咸若。卽親親仁民愛物之盡。俱在外而推行上看。此一節卽上節道理。極言其量之大。而孝弟之不可不務耳。非另生出仁字也。爲仁仁字。只在外邊說。不指精微。

楊 君子思爲仁于天下。則必有爲仁之時。與爲仁之具矣。**薛** 何時不是。何處非具。爲仁自家及國及天下及昆蟲草木禽獸。王者布衣。皆有其事。豈待得時在位者耶。

爲仁煞有事在。

爲字中分量亦不同。

朱子恐人誤認孝弟是仁之本。則頭上安頭。故引程子之說于圈外。要人認取爲字耳。爲字著。子說向周遍及物處。則其義自得。今但粗見此說。而不明其義。左排幾句圈外註。于有若口中自爲辨駁。煞是可笑。

道理說不去。只爲脫爲字解。看程子謂行仁之本。不可謂是仁之本。朱子謂爲字當重讀。便明。

仁與孝弟交關在爲字。爲字明。則程註始字自明。

錢世臺文自記上二句是虛說。下二句是實說。註中凡事二字亦是虛說。朱子云。本是說孝弟。上面且泛言。下面是收入來說。其解自明。若云凡事類然。何疑于孝弟。便將上下看成兩橛。一誤。

也。孝弟爲仁之本。集註云。仁道自此而生。若作始字解。則與生字不合。便與本字不合矣。卽第一次坎二次坎三坎之說。亦出朱子。然于集註不合。或是未定之論。卽以水言之。謂一二三坎之水。皆出于源。則可。謂二三坎之水。出于第一次。則不可。如可謂二次坎之水。出于一次。則三次坎之水。獨不可謂其出于二次乎。此非有子本意。朱子已圈外之。而今人猶用此解。二誤也。皆不善讀集註之過。翻本字與道字對。立字與生字對。註云。其道自生。次云。仁道自此生。則道不專指仁也。本字原有二義。一爲要約。一爲初始。仁爲孝弟之本。重要約義。孝弟爲行仁之本。却重初始義。纔說个爲字。便有次第之序。親親而仁。民愛物。故行仁自孝弟始。孝弟是行仁之一事。未爲謬也。若主要約義說。則正犯程子所謂仁之本。不是行仁之本矣。朱子一次坎二次坎三坎之說。正

與集註意合。如謂一二三之水皆出于源者。此孝弟與仁民愛物皆出于仁也。謂二三坎之水出于第一坎者。仁民由于親親。愛物由于仁民。卽謂第三坎出于第二。亦無不可。但親親爲太耳。凡補全章意。朱子皆列之圈外。非謂與集註不合故也。凡事用力于本。則其道自生。又見行仁有仁之本。行義有義之本。無舍一事之本而務萬事之本意。此誤坐本字與生字對看。而道字粘住仁字。却不重看爲字耳。

譬之水。孝弟是第一坎。仁民之仁是第二坎。愛物之仁是第三坎。孝弟之與爲仁。其科坎不同。然水只此水耳。若于孝弟外另講爲仁。便非本字之義。

爲仁仁字甚廣濶。平章協和。於變時雍。及上下鳥獸草木咸若。都在裏可知有多少事理。但其次第必親親而仁民。仁民而愛物。

若無此次第便是異端二本。不成箇仁。故曰行仁自孝弟始。虛齋不肯將行字代爲字。始字代本字。則以孝弟是仁之本矣。孝弟是事上說。仁是性。豈有事爲性本之理。孝弟有孝弟之事。爲仁有爲仁之事。但爲仁之事必自孝弟推行出去耳。朱子謂本立則道隨事而生。如事親孝。故忠可移于君。事兄弟。故順可移于長。正是行始二字義。虛齋自錯會耳。

孝弟是本根。仁道說盡處。從本根到盡處。其中煞有次第層級。止說兩頭。則爲字落空矣。

自親親仁民。仁民愛物。道理一路分派下去。天然自有等級。

人自父母兄弟以至昆蟲草木。其等不知凡幾。于父母兄弟面上用得十分意思。逐等殺派至昆蟲草木。尚有一分二分。若先于父母面上只得三四分。下便推派不去矣。所以人只要於父母

兄弟意思。使之極厚。此之謂務本。根本既厚。則以下便自推廣得去。亦不必更事講求。本立道生。只是如此。

釋氏平等。便是倒行逆施。

今之放生。戒殺齋供。施捨以爲行仁。吾謂此直行不仁耳。富貴之家。每於此捐重貲而不惜。考其家庭孝弟。則有不可問者。一貧窶親族入門上座。便疾憎峻拒矣。蓋以所捐者明捨而暗來。家庭鄙賤。則有去無還耳。只此一自私自利之念。便不仁之甚。直是待其父母親族不如昆蟲。僧道矣。故予謂凡感應功過勸善之書。皆勸惡之書也。其本不仁也。

是論語第一章言仁始。故註云愛之理。心之德。兼解全部仁字也。此章專主愛之理邊說。

曾子曰。吾日三省吾身章。

三省鞭辟向裏。直追到心體幾微處。不止向爲人朋友師傅求無負。不忠不信不習。亦在幾微不覺處加察。是曾子思誠之功。爲人謀事。雖極盡心。畢竟與自己有別。此私心也。

不忠不必有心僨敗人事。只謀事到八九分便佳。此一二分。則德怨利害之故也。

盡已爲忠。盡正難說在。

如烏喙食之殺人。若止云傷人。便不是忠。註云盡已之謂忠。盡字極難說。纔自說盡。便是不盡。

夫人日以其身涉于天下。凡有感。則皆吾事之所寓也。凡有事。則皆吾道之所存也。凡有道。則皆吾身之所接也。有感而有事。事卽有道。道皆吾身分內。極分明親切。但接字不當。接是事感。不可以言道。自記曾子三省。不必拘泥三件。總只是凡

事皆省察自反耳。**評**曾子只舉得三省。文却替他補無所不省。自以爲得曾子之深。不知正是見三者之淺也。

子曰道千乘之國章

敬字貫始終表裏。

此敬字不必深求。只貼事字說爲是。信字又離上二字不得。

信慕言與事乃全。

信從君心與民相交接處說。

廉也。純然貴功者畏于事。見其可利也。則必前後慮其可害也。**評**說來毫不切敬字。不過于利害得失上審思熟慮耳。**文**令之行也。疑之自我。民之反覆則無以責矣。**評**信字不過粗。故猶及申韓之信。若敬字則直頭不是。

陳際泰文事已行而更之。固非政體。**評**要更的。便已行也。須更何

非政體。此卽後世刑名之見。**經**治國之理。以畏慎爲先。而果決繼之。使非有小心沉氣。爲之審始治端。而曰吾言旣出。無反汗焉。此後世刑名之士之所爲。豈足尚哉。**評**講做了果斷。非信也。仍是刑名權術之言。卽欲破辨。而于敬信原頭不的。說來仍是作用。

節愛之本。亦只在敬事出來。

節字亦本天之道。不是心計作用。

金聲文名實之際。有綜覈之者。而天下無敢以侵倖爲漏也。**評**此便是雜霸伎倆。不是王道氣象。**文**宇宙之財。但有此數。不過相流轉于天地之中。**評**聖人正在這上面。還他个無過不及之謂節。

人兼臣民說。

使民以時。特愛人中之一事。王政重農。故又另言之。

節非吝嗇。愛非姑息。時非廢怠。

節愛二字。人都在事機法制上。擘畫其下梢。不得不爲權術之言。于情意真切處。發揮當理。節字便淡然見。廉靜簡易之風。愛字便怵然見。惻怛深厚之致。方是聖道之節愛。方是註中論所存。未及爲政之義。時文頗吟喝心字。何曾一句道著心上。

楊氏論所存未及爲政之說。本之伊川。伊川之意。正爲此五者煞有條目。實政在。恐人不去講求。故云此言淺近。而堯舜之治。亦不過此。皆欲人向此五者擴充推極也。是補言外義。故朱子列之圈外。近來反以此爲正意。將心字糾纏。若云求治于一心而有餘。却正犯程子之所病矣。

子曰弟子入則孝。章

謹信三句。本文無貫孝弟意。然重孝弟亦合務本之旨。固不妨自見發明也。又不可與穿鑿傳會同語。

莫小看了汎愛衆三字題目。胸中有一篇西銘道理。一本小學意思。纔發得義蘊盡。

學文雖末。然非小事也。聖賢豪傑將終身焉。在弟子當先務根本。且知識未充。故必有餘力而及之耳。

有餘力三字中。便有敬者用意。

文不只是文書。不只是著作。不只是小學堂課誦。

學文正是博學審問慎思明辨之事。斷不可少。蓋不學文。則不惟固陋。正恐上數事有差誤也。

學文句。淺深精粗並至。卽志道章游藝之旨。

今童子六七歲就傅。便事讀書。問讀書爲何等事。則其父兄茫然。

其師長亦茫然矣。人材從小便教壞。又安望其成人物也。今日村學堂中。肯真一本小學。下老實教做去。世上旋旋出得幾箇好人。大人。此豈小小事業耶。若只講做時文。無論醜惡。卽做到極處。與所以要讀書事毫無干涉。凡爲父兄師長者。不可不省此意也。

子夏曰賢賢易色章

賢賢與朋友交不同。人多混看。

易色只極形賢賢之誠。不爲賢與色較。若但于賢賢後轉合色字。是賢與色比並說一件。仍兩件矣。縱好亦只成賢賢如色。非易色也。

事君能致其身。此是千古臣破的語。凡筮仕立朝。每事俱從身上起見。縱使勲業爛然。直聲震世。究之打此關不過耳。

知其身爲何如之身。而後又知爲何人之身。則必能致之矣。證今人但知庸鄙富貴之身耳。此看得其字不苟。

未致前身字原不輕。自具泰山巖巖氣象。

雖曰二字。須活看。曰者。他人不確之論也。人先坐煞未學。便有何必讀書之弊矣。苟非生質之美。必其務學之至。正深嘉其學耳。文學科中人。見得文學虛僞之弊。盡而爲此言。非欲廢學。正欲學之務本而盡其誠耳。

雖曰必謂言所期於學者。不過如是。非歎美其不學也。語氣抑揚間。其意自見。後來欲借以行其不必學之說。遂謂卽此是學。而凡爲讀書窮理者非。因謂註中生質之美二句爲支綴。則子夏幾不免爲聖門之罪人矣。蓋聖門教人。只有知行。學所以致知也。行以踐其實也。二者有專舉。有全提。聖人之言。雖專舉而自

全賢人之言。則不免有偏重之語病。如此節專重在篤行。則輕在知邊。他日子夏又曰學問志思而仁在其中。專重在致知。則輕在行邊。合二章互觀之。可見其理之一矣。故朱子於博學章補雖未及力行意。於此章補生質之美。篤學之至。正見斡旋妙義。

入時人手。便做成子靜六經爲註脚。伯安格致爲義外。害道不淺矣。將子夏立說苦心。補完語病。結出註中生質務學之意。分外光明。方是有功聖學。

陳 **語** **文** 世之所謂學者。或窮性命之旨。天地不足爲高深。而考其行已未盡。則來浮夸之號矣。或負恢弘之才。國家不足當經綸。而按其本原可議。遂爲偏雜之器矣。**經** 後世號爲名士者。其平生所得。不出此二種。熟于良知之學者。則兼此二者。

王介甫折張天祺曰。賢却讀書。某却不讀書。程子聞之曰。只此便是。不會讀書。今人每緣多讀幾卷書。胸中便有多少樣子。隨其所爲。靡所不可。若以程子之義律之。只是不讀書耳。

學問只在日用倫理上辨取一誠字爲難耳。今世講學尚氣節之徒。其中不可問。有更甚于流俗者。是僞妄曖昧。又過于小人也。**鄧鍾文**三代以前。人倫忠厚之遺。時見于士女之末。三代以降。名教傷心之故。輒發于談道之人。**評**今之講學者。其底裏更不忍言。

杖親拜賊。大約皆世家名士。言之可痛。

子曰。君子不重。則不威。章

首節

此爲已有學者言。則不固三字。原指既有之學。

楊以任交當其學也。終身爲理所愚而攻之則瑕甚矣。不重之爲學累也。評理豈有愚人者。此卽陸王攻程朱之說。又重不重爲學使也。君子蓋未有不重者也。評聖人明言君子不重則罔有君子而不重者也不威之下而云學則不固則罔言君子既學而有不重者也。蓋不重只是氣度養得不足不是根本上事。然却能搖動根本。聖人言此以見外面之不可輕視耳。今必要說君子無不重。君子之學必然重不重由其學來說來未嘗不是道理。却與本節之意不合。定要與孔子拗譬一上以爲高。聖人說外面我畢竟要說裏面亦可笑也。

有友論此節重威只是初學外邊儀節上事。故序先於主忠信。余曰。重威亦是徹始徹終事。初學工夫須從外面有形象處扶豎起到得既學後亦有因不重而走作者。此是涵養精細工夫。非

粗節也。友曰：到君子既學，豈尚有不重者？余曰：如此說，則君子而不仁者有矣夫！更說不去也。

沈受禎文：世之人，顧以爲盛容飾貌，無益于學。內治謂何耳。**記**自來異學之改正學，不出此旨。

主忠信節

通章重學字。陳定宇說也。然是文章線索耳。道理所重，却在忠信游院判謂學之道以忠信爲主，故重學字。正爲重忠信也。

無友不如己者節

陳際泰文：我擇乎勝已而後交，則友又將擇乎勝已而後交，必窮之道也。我擇乎如已而相締，則友又將擇乎如已而與我相締，兩濟之方也。**記**毋友不如已，恐其好勝喜佞，日就污下。如孟子所謂好臣其所教而不好臣其所受教耳。豈謂不求勝已之友？

乎。若必求如已者而友。則以水濟水。卽友不如已之病根也。

過則勿憚改節

知過不改。其病只坐一憚字。

陳今日因循。其後必至于甚。**評**卽憚改時意已大病。不必論後日也。

勿字如旗脚之麾。正有力氣在。

曾子曰慎終追遠章

慎終切盡誠盡禮說。教化另有條目在。

慎終追遠指躬行盡禮盡誠處。非泛論制喪祭之禮也。

民德歸厚。謂民亦知反本盡誠。可以施教化。而出治道。非謂卽歸厚於君上而服從固結也。

慎終追遠。只自盡其道而民自歸厚。非謂欲民之歸厚而從事於

慎追也。爲民而從事。其慎追之本已失矣。民何以歸厚乎。凡下句說到功效者。必不可倒講。此義利之辨也。

子禽問於子貢曰。夫子至於是邦也。章

首節

亢意只在求與字。却從求字轉出。體貼抑字便見。故子貢亦不更辨與字。

子貢曰。夫子溫良恭儉讓以得之節。

五者正要說在外面淺易處。千人萬人一望卽見得如此。雖冥頑庸鄙皆可信。故必聞其政耳。又須知聖人原無打點五德之意。在邦君心目間感化彼。且不自知所以然。又從何見得。卽在學者自見聖人處。悟其所以得聞在此。

人做得之。只在夫子面上說。便如兵符在手。是五德皆鉤致之術。

矣。

此是子貢推測必聞政所以然。亦是子貢眼中見得聖人德容氣象如是。聖人固不自覺。非真夫子挾此五者之術以希合於世也。

此是子貢善言聖人處。聖人初不自知有五者。又安得以五者新聞政乎。沾沾爲聞政而出此五者。聖人亦大狡黠矣。

子貢言下薦機。隨波逐流。只爲子禽鈍漢求與二字作轉語耳。若說夫子實以此五者得之。或五者便必得國政。卽犯死語矣。夫子何心以五者得聞。卽得亦止聞之耳。何嘗得政哉。得字止是人樂與言。故五德亦但就和易一邊說耳。

溫良恭儉讓。只說得聖人發見處。在聖人發見處亦只說得一半。故註下過化存神之妙。未易窺測數句。正爲子貢幹旋語意。令

後人不倒看錯走作用其義甚精。

金仁山謂註中盛德過化存神是補內一層亦字與圈外謝氏三亦字是但指其外似矣而猶粗在未見朱子意旨也所不足於子貢者爲此五字於夫子德容亦止得其謹厚謙退不自聖賢之一節於聖人中和氣象多所未備看子溫而厲望之儼然二章可見朱子恐學者看錯一鍼一向偏於和柔則鄉愿流俗之害生故正欲補其外意不重內也惟德盛盛德是補其內亦字與三亦字是但指外之一節亦不是補內緣子貢爲子禽求與二字下轉語以得之三字却著痕跡朱子爲此三字補滲漏耳五者只在聖人德容應感處若以此說盡聖人全體却不是五者只在相見處可見處。

五者只還他是德容只德容便使人傾動不必要擡高五者亦

不必更追重向上一層。而所謂過化存神之妙。未易窺測者。亦無不昭然矣。

人總看得此五件平淺。不足以槩聖人。便要就上而別尋高一層景象。不知正不消如此。看註中卽此而觀其德盛禮恭云云。則所謂過化存神之妙。原懸起一層在五件上。正不當看低此五件也。

夏官明 玄德升聞。堯命以位。不是初見舜容卽命之也。**評** 玄德升聞而命以位。此以聖人禪聖人也。溫良恭儉讓而必聞政。此以聖人感庸人也。豈可以此比例。要之命以位。則聖人亦必歷試詳慎。若必聞其政。卽堯初見舜容。亦必爾爾。

夫子之之字。正指上句也。

夫子之求之也。是子貢巧作轉語。求字卽在得字內轉出。正繳足。

上句不是上句下轉開也

溫良五者與聞政何干而必得若此真不可解此不可解中異乎人處已起

人之求亦有得却非夫子之得

子曰父在觀其志章

開口便說父在父沒則志行原從孝上觀也若到三年無改句纔講孝則上面說箇甚

要知急改父道者不定要非其親只是要急見已美耳

有子曰禮之用章

朱子嚴而泰和而節六字盡一章意

金聲說禮本是以和爲貴則可而今必謂禮本是和書生之見蠢滯如此知和自是世上一種高明曉事人方之拘儒矮

漢千百倍矣。有子還是急爲不知和者說乎。還是爲知和者說乎。將語脈思看。道理思看。語天高地下萬物散殊而禮制行。纔下箇禮字。便十分嚴肅。異端看得這嚴肅煞艱苦。道是聖人將箇外加道堦柴柵纏繳人。於是悟得真性本無物。禮豈爲我設。正知和而和之源流也。有子見於此。故卽此嚴肅上指出自然道理。看其運行處。心安情順。有非此嚴肅不可者。便是真性流行。原非有所艱苦也。如拜跪于君親。揖讓于賓友。雖極敬畏。然必如此乃安。但于拜跪揖讓間。見得此意。所謂和也。知和而和者。便謂拜跪揖讓。不過致此真意于君親賓友。吾已得此意。雖不拜跪揖讓可也。其用必猖狂蕩佚。禮之本體皆失矣。又安可行乎。大意祇是如此。正希爲佛學。看得知和而和一流。高于儒者。固宜其曲爲回護耳。

歸有光文世之爲禮者不知循天理之自然而以爲強世也久矣
評只此是病流爲邪異晉人曰禮豈爲我輩設耶此真禽獸之
言而後世猶以爲美談此良知之說所以日熾也

陳際泰後

禮之大本所以防亂亦以飾觀也

禮便看得淺陋不知

禮意

禮之本既緣人情以爲端則禮之用亦宜以便乎人情

而後貴禮之以人情爲端者如鐘鼓管籥以飾喜干戈弓矢
以飾怒衰麻哭踊以飾哀皆因人情而生品節然其原則本於
天聖人役之以降命聖人不敢以己意與其閒況徇凡人之欲
乎惟其本於天故等殺品節秩然有制而不亂卽所謂禮之體
之嚴也惟其本於天故其行之也貴乎從容自然而各安其倫
卽所謂用之和也嚴與和皆天也今日嚴則不便於人情而和
便於人情是本心之學非本天之道也是以和爲禮之本而非

禮之用貴和也。自晉人尚異教，破壞禮法，至謂禮豈爲我輩設，則直滅天理而徇人欲矣。士大夫之見解如此，此晉以後之天下所以不可言也。

禮之作也，先王有虞于天下也，慮其無以相與也，故期乎通之云云。自然不可已之道，非從虞慮造出。江西諸家總不識得禮字，憑他橫說豎說，都無一句道著其精者，不出莊子其粗則良知家詆毀程朱之道學而已。須知老泉禮論，罪不容死。

首節

鯀有光文云云。禮之爲體雖嚴六字最立得妙。纔見之用字爲貴字。有子不是亂下。震川於用字少體會。似云禮本自和者。正爲於註中六字忽略耳。然看其小意，或者見其品節防範。

之嚴而因以重疑畏之心。及中幅恭儉莊敬似有以嚴天下之分等句。原未嘗不見此旨也。陳百史妄評禮之用不添一體字和爲貴不添一嚴字以爲妙。其實震川未必如此。此種議論最不通害事。今後生厭棄集註而惑亂于邪異之講章。皆此種議論爲之煽爚也。

有子講道理喜就下一概說。故和只在用上見得。朱子補出禮之體說深有意在。惟其體本自然。故其用從容不迫。和原在禮內。若止向用處尋和。便是禮外添了一箇。故凡朱子幹補字義。雖本文所無。必須提闡。自隆萬來以註爲支離。必以渾融脫略爲妙。亦本於異學改復古本大學入室操戈之私意。而微言大義隨之漸滅矣。

禮之全體中便有和在。

黃淳耀文手莫使而自持。足莫使而自行也。先王以禮安之。曰如是則手足可以無忤而已。**評**如是乃盡手足之性耳。如何說得恁輕。

金聲文問禮所由起。禮不能自起也。則由物生。**評**此等議論。是二氏長技。惟看得由物生。故以禮義爲外耳。**文**無物以前。豈嘗無則哉。雖有創禮。而以其名昭垂者。不知禮更超創垂之先。而涵其用。**評**用字倒看。在禮上頭。口中說禮。意却指和。然正希所指之和。又是有物先天地耳。**自記**謂禮之用。自和不願人以和用禮。繹語意實非是。**評**禮之用。自和。故和不在禮外。若以和用禮。分明自有箇和在矣。此解有何非是。如文中所言。仍是禮外有和。只緣用字看得不的。之字有無一般。其病便蠡起耳。

和字須抱定禮之用三字說。謂禮本是和。固非。謂禮本是以和爲

貴亦非。蓋禮者天地之序。其用則本和耳。如正希言和却在禮外矣。其所謂和。非有子之和。乃禪和之和也。千子病其太費周折。猶是語句上較量。不知其本原受病深痼在。

題固是禮之用和爲貴耳。正希文却說做禮之本和爲貴。僧洪英云。汝行茶來。我爲汝擎。汝行益來。我爲汝受。汝問訊。我起手。說箇甚麼。于頔問藥山如何。是佛。山召于頔。頔應諾。山曰。是甚麼。悟此便知正希之云矣。

只講禮字。不要講和字。和字本無可講。只於禮字中見之。纔著意單講和字。便是知和而和矣。

由之。是凡事由先王之道也。

由之。是小大事皆由于禮。下不行。是禮不行。自不得彈看。

有所不行。節

纔覺得和。便是知和而和。

和字雖同。其所爲和已不是。猶阮之狂。二氏之自在。正是不和。然皆自以爲和。其錯却在知字。

黃淳耀文和爲之內。節爲之外。**節**和節不分內外。如此分。則理倒矣。

禮之體本嚴。而其用則貴和。和非禮之本也。知和而和。失禮之本。故曰以禮節之。不曰以嚴節之。蓋道箇禮便是嚴也。看和與禮成兩件。固粗。看和爲內而禮節爲外。更粗。

有子曰信近於義章

此節都在言行交際尤悔極弊處。作傷理寡過之思。是降一步說。不是盡頭道理。不則義禮如何云近。交親如何云不失乎。故可字遠字亦可字。從近字不失字生來。而近與不失字又從信恭

因字生來。若將恭信因看得重大。下面便說不去。信只指期約。恭只指小節。因只指踪跡。於最輕易忽處。能近而不失。自然可且遠矣。

信只是偶然期約。不經意處。言之所以不復固。由於失義。而義之所以不合。由信原最易忽略事。人多率任少斟酌也。

復只在信時。可之理已在。

遠字原在我。

此節信恭因三字。總要看得極輕。如因字不可便做求友看。只是踪跡初交處。或偶然遇合。或庶事作緣。不必大倫中朋友之正。然亦將終身與之。或其中亦遂有足爲朋友者。其初必有所因。而交。故謂之因。若竟作求友論。則不失亦可。語意都說不去矣。因字與朋友之交不同。

親是當下事。宗是徹終始事。

今人看朋友二字便不仔細。朋友在五倫內。與君臣父子兄弟夫婦相同。平生關切身心不多數人者是也。其餘自尊貴及閑散卑下之屬。雖跡跡極密。皆後來旋成朋友。然初因也。非朋友也。故因字所該者廣。古今朋友之變亦多。從因字錯來不可不省。同非才略過人。無地以起聲譽。見名高黨盛者。或因以取濟一時。然而世之末路蹉跎者。何嘗非振人窮困者乎。隱依傍以求成名。隱忍以就門戶。後來悔恨不少。又收羅道廣。趨從不遺小善。見修能飭行者。且因以緣爲同志。然而世之前後易轍者。其孰非傾人邂逅者乎。林宗以得孝子。石齋以得逆徒。知人之難也。

陳際泰文。千里尋師訪道。則其情專。專則意在得人。失焉者寡。所

患者非爲是事。因旁舉而及之也。**評**其實大小一理。尊師取友。自以爲精擇。而誤投門戶。終身陷溺。如陳王之徒。遺害末流。亦失親而不可宗也。**文**居恒論品定交。則其意閒。閒則旨在正合。失焉者亦寡。所患者。勇于自售。因私途而致之也。**評**此却是自已過惡。不算在因字帳裏。結伴作賊。亦可講親與宗之理乎。

陳子龍又云云。**顧偉南**儒者不知時事。徒好窮理。至於此等事。則茫然不識何代矣。此章語定爲春秋列國會盟交際而發。惟朱紫陽能知此解。故其解末二句。則有曰如先主之依劉表是也。儒者口道宋儒不絕。解此等書。便漫不留目。何怪乎困守章句而不曉大義也。**評**雲間好論史事。利害成敗。凡題必歸之君國。便於發粗議。張大言也。聖賢語言。理無不舉。如大易象繇自天子至匹夫皆可占。若謂爻爻必指天子而發。豈可訓乎。作者偶

然習氣可耳。評者便以爲理解當然。何異向癡人說夢耶。

子曰君子食無求飽章

時文每于起手贊頌君子二字。直是無謂。君子定不好名。一贊頌則于好學之意失矣。

上四句一氣追注末句。先將好學二字。立在面前。四句血脈節節相足。歸結到底處。乃見全身。若逐句挨排漫衍。便散緩失神矣。首兩句似粗。却是入門徹底大界分。

須先有所好者在。故無求。儘有無求者。又不是好學。

無求。正要看他畢竟爲何。若下面不是。連無求都不是。

是做工夫後。恐有差謬。又恐有未盡。故曰正焉。正其所已得也。

錢禮文始焉求諸已也。服勤久。則此心有自得之處。**雷**不則就正。

箇甚麼。交既焉將合諸師友也。講求切則此理有至是之歸。近則就講學者必差路矣。須先定路頭而尋有道正之。有道亦多虛僞也。

鄒玠文吾儒學道爲庸人所怪。無爲君子所惜。吾專力致勤。背衆情而不顧。棄世有而不居。而爲一事。則庸人怪矣。吾專力致勤。背衆情捐世有而爲一事。而又與道乖謬。後之君子有深惜餘論焉。則大不可也。讀書人志趣卑陋。至今而極。不但八股也。如詩古文詞再進而說經講學。總是一派。不求實得。自置於古人。止欲騙取世上庸妄人。互相盲稱。賸贊不畏深山窮谷大有。人在遠付百年。公論自出。恨封德彝輩無如許壽及見之耳。看就正一段偉論。獨發學人文人俱宜奉爲龜鑒。

須知君子之學何學。而後講好之如此。若學字不曾分明。則所好

終成駁雜。非君子之學也。就正正非容易。有道亦亂認不得。

王庭文俗學無論焉已。亦有世味之外。逍遙無營。止稱達生。而無當于聖賢之正名理之中。勤苦有獲。或入異端。而卒恨于毫釐之差。學問之事。良不淺鮮。豈徒曰吾學之而已。又豈徒曰吾好之而已乎。**評**凡爲好學。必有是四者。有是四者。只可謂之好學。未可謂之有道也。須看他所學何學。如鄉愿之學。佛老之學。詞章之學。功利作用之學。以及後世陽儒陰異之學。苟好其一。未有不兼是四者而後謂之好也。然可惜枉用一生心力于道何曾見得分毫。文能發明此理。真是舉頭天外。或問園外尹氏亦發此旨。然則取正于有道。卽所學不謬矣。豈尚有非其所好者乎。曰。正爲有道二字難說。陳相悅許行。神光叅達磨。王良拜伯安。他也說是就正有道。傅子淵包顯道。袁機仲之流。就紫陽而

不知正。彼且以金溪爲有道也。奚其正。故中庸曰。愚知人不可。以不知天如何得知天。只是格物窮理。

註凡言道者皆謂事物當然之理。人之所共由者也。是借第一節道字。訓明全書道字之義。猶務本節訓仁字。兼說心之德其實務本節仁字。只重愛之理。此節有道固指共由之道。然只重有此道之人。不便單提說也。或問道字前已兩見。何獨至此而全訓之。曰。父在章道字。只指前人之志事。禮用章道字。只指先王政治說。都不是學問通舉之道。故註始于此。

子貢曰貧而無諂章

此題一節生出一節。然須一節不圖生出一節。方見聖賢知處無方。引伸觸類之妙。若做一節。隨有一節在意中。神理索然矣。學問中人。未必盡無驕諂處。貧富便是學。樂與好禮。是他性情造。

詣如此。初非以貧而樂。以富而好禮。故進於無諂無驕。子貢引詩。悟得天下道理。皆不可安於小成。不專以此爲樂好禮之工夫也。告諸往。只是告以處貧富之道。知來。只是悟得天下道理。皆不可安於小成。

首節

子貢無諂驕地段亦儘好。

無諂無驕。止去得流俗私情。原未有義理自勝處。便易走作。

金聲 貧旣絕諂。貧且無聊。富旣戒驕。富且無味。非樂與好禮而處貧富之人。反不能自適其性命之安。**語** 此義確然。若中無所據。果然難過日子。

晉人任誕。正從無聊中來。

樂好二字。須有本領在。

樂與好禮講到學問至處。孔顏之疏水箪瓢。舜禹之恭已無閒。境界無窮。全在離貧富看。如作樂其貧。好禮以爲富。便不是道理。正爲子貢意中。看得無諂驕已至。夫子又爲指出樂與好禮境界。樂與好禮。卽無諂驕更上一層。非埽却無諂驕也。朱子謂有人合下便樂與好禮。不更回來做諂驕。又云。今人未能無諂驕。便要到樂與好禮如何得。明此二義。其理始圓。

子貢曰詩云如切如磋二節

斯字只就上文說。往來只就問答說。萬曆以後。竟寫做話頭公案。書意始漆黑矣。

往指首節所論處。貧富之道。來指子貢所悟學問之功。故註曰。已言未言。須畫開兩邊說。惟其不相涉而觸悟。故可與言。詩在此。須知夫子此句。只是許可子貢知義理無窮。能於學問推充不

重在言詩也。

許可只在知字。知字只在旁通處。不關切。磋義理也。

陳之遴文自記。子夏因論詩悟禮。夫子許其可與言詩。子貢因論貧富悟詩。夫子亦許其可與言詩。二章皆言詩也。貧富之論。特其緣起耳。子貢知義理之無窮。正其可與言詩處。若只許可子貢。告往知來。何必云可與言詩耶。**語**。然雖如是。畢竟不同。子夏原是言詩。此章却因學問說到詩。可與言詩。亦正爲他于學問進取無窮耳。遮上面又有一轉在。不得竟將詩做了盡頭。

子貢引詩就可也。未若轉語見箇義理無窮。已不著貧富上。夫子許可子貢。又說他觸類通達處。喜其知不滯而進取高遠。并不著詩上。并不著義理上矣。時文粘皮帶骨。所謂守枯椿獵犬也。好談禪理者。定弊拗人。凡當靠實發揮者。必觸入虛境。及當融會。

脫灑者。又偏要拈住不放。如此兩節。卽白文亦離貧富說矣。而通篇纏縛。使子貢見地超越。觸處旁通。歸本學問。及聖人誘進義理。發明詩教之無窮。皆死句下。其病固不減走空也。要其胸間實有奈何境。緣不下處。故每於貧富窮達上。介介不能釋然。其平生刻鵠處。亦正不釋然處也。

呂子評語正編卷四終

呂子評語正編卷五

論語爲政第二

子曰爲政以德章

爲政以德。是現成象。是圖圖句。拆開不得。層摺不得。朱子曰。德與政非兩事。問是以德爲政否。曰。不是把德去爲政。不必泥以字。只爲政有德相似。細觀其理自明。

爲政以德。猶云有德之政。不是德與政分論。故爲字以字都不是著力字。

他處虛字要著力。此句以字著力不得。若云以德去爲政。卽分德政兩事。卽向外去。其德亦驩虞黃老之德耳。

爲政以德。不是廢政。但以德先之耳。

是爲政以德。非尚德不尚政也。

首句止得半截話。無爲而天下歸意。在第三句中見。今人輒于首句一氣講完。而輕點譬喻以證之。自以爲高。而不知失語脈也。**楊以低**。爲政者之如辰居星共也。此自然之勢。顧不以德而可恃。其如是耶。**以**德外原無如是之象。居所而衆星共。正以譬德之主宰運旋。只指出無爲化神之意耳。非擬天子高居而四方環衛也。從勢上起論。便失其旨。上句止得半句說話。一大半道理正在下句譬喻中見。與上句說盡而下引喻作證者。又不同。說天象。正說德。包在言內。今却分天道主德作兩件說。又似相感應者然。更失遠矣。

章句。天建日月以經之。立五緯以治之。布二十八舍以期之。然皆動而遠者也。**評**。日月亦緯也。緯不隨天動。二十八舍爲經耳。**又有**運而近者。斗杓是也。又有運而近者。四輔是也。**若指**

近極則天樞句陳數星耳。斗杓四輔如何數得著。此皆鄉里無稽之說。并不可謂之搬衍學問。且於居所衆共意何著。此句中須有上句在裏也。

北極亦自動。第人不可見耳。

此頗與黃老相近。得黃老之精。則所謂居簡馭煩。以寡制衆。亦自見得此意。頗其彌近理而愈失真者。其所謂德。非吾之所謂德耳。昔人謂漢以黃老治。如曹參之守法。陳平之不對錢穀刑獄。與文帝之謙讓未遑。放賈生置喙錯之類。皆是。然亦祇得黃老之粗者耳。何則。北辰居其所。是動之至。非不動之至。黃老之所爲德。在至勞。非至逸也。而漢人惟知以逸待勞。故吾謂黃老之精。漢人尚未之見及也。而後世所見。又出漢下。治天下之法。固宜其架漏千年。而三代以德之政。終不可得而見也歟。

孟子卷五
自古君道未有求逸者。卽無爲而治。亦人不見其迹耳。聖人煞憂勞無逸。

子曰詩三百章

此是論詩教之大旨。示人以讀詩之法。舉全部詩經而言。非指作詩之人之事。亦非釋詩之詞義。爲逐章逐句尋解脫法門也。此乃聖人指詩教之本。教人讀詩之法。不是讚詩。亦不是論思。亦不說詩之思本皆無邪也。

全旨重無邪。不重一言。范氏守約之說。是題外推廣義也。各經皆然。何獨詩乎。故次之圈外。

一言不是貪省求直提。

須知不廢全詩。大士文謂得實而捐其名。歸真而忘其途。而一經之義統矣。此莊周筌蹄糟魄之說。聖門無此旨。

但取悟要之意猶可言也。至謂悟得一言可蔽。即可不須三百。此大亂之道也。然而講悟要。勢必至此。故悟之一說。無忌憚之術也。

詩之緣起。原從采風考事而立。只一採訪陳觀閣。可知有先王許多刑賞慶讓補救化導之道在此。無邪之本也。後人讀詩。提起此意在前。則雖誦淫奔昏亂之章。皆得性情理義之正矣。後人不明斯理。反以朱子之說爲疑。若聖經必存正去邪而爲無邪。則大易不當設見金夫不有躬之象。而春秋亦不當載姜氏會齊侯之文矣。

要知後人要抹去淫邪。正見他滿肚淫邪。怕人提起耳。

知其爲邪。即無邪也。若揀出邪放隱處。邪愈有矣。後學怕說到邪。正見他渾身都是邪耳。

註中善者感發惡者懲創二語。是無邪定解。近來作者惡切實而務圓通。都不肯如此做。或全主一言。或只拈思字。便似夫子離却語言文字。立不二法門。直指人心者。其害道可勝言耶。然其來亦有所本。由王伯安竊陸子靜之說。以畔朱子。謂三百無淫詩。然猶知其說之難通也。則歸咎漢儒雜亂。夫子已刪之詩。非古經矣。至郝京山敬祖述其意。猖狂譏詆。謂既經刪正。淫詩焉得復在三百之內。朱子於詩稍涉情致。卽爲淫奔。使聖人經世之典。雜以諧謔。初學血氣未定。多生邪思。致蒙師輟講。父兄不授。故其詩解一以古序爲斷。今卽序論之。則桑中蠹螬。氓丰東門之墀。溱洧東方之日。諸篇在序。已不得不言淫亂矣。其詞獨非諧謔。初學聽之。獨不生邪思。蒙師父兄獨可哆口而教乎。至毀朱子爲高叟咸丘蒙。而以子貢子夏孟子之言詩爲斷。夫說

詩與註詩不同。以說詩律註詩。此所謂高叟咸丘蒙之見也。果如敬言。則亦但虛懸本文。聽人解悟圓通足矣。又何必執古序以爲左證乎。又謂朱子將六經許多義理。割與二氏。自守皮膚。趙貞吉亦自謂不諱禪學。禪正是聖道之精微。朱子自割以授二氏耳。盜憎主人。民惡其上。其悖妄一轍。正可見其底裏所自出。嗚呼。自孟子割之以與翟朱。程朱割之以與佛老。久矣。敬與貞吉。乃援而入之。多見其不知量。又何傷于日月乎。時文雖藝事。然務圓通而惡切實。正儒佛邪正之分。不可以不辨也。

附此章文

聖人明立經之旨。卽於駟辭取義焉。夫詩三百。無非思之所爲也。夫子懼人之入於思而忘經教矣。卽以駟之言無邪者蔽之。謂詩之大旨則如此。今夫六經皆治心之書也。然諸經之治心也。

嚴而詩之治心也以柔。嚴則可畏，柔則可親。先王曰：吾使之畏而私伏於中，又不若使之親而盡出其私於外。至於私之盡出，與後世共見焉，則柔焉而嚴之至矣。諸經之治心也，斂而詩之治心也，以生斂則不流，生則不已。先王曰：吾使之已而情制於正，又不若使之流而博極其情於變。至於情之博極，與天下並論焉，則生也而斂之至矣。此詩教之所由立也。然而學詩者習於柔而失其嚴，樂於生而昧其斂，則何也？諸經治心之意顯而詩則隱也。其所以隱者何也？凡所謂經也者，或自聖人作之，或自聖人述之，或聖賢行事而爲之下者紀之。或凡庸之編載而聖人爲之論定之。讀之者震震然有一聖人立於其前，卽震震然有一聖人之意行於其內。若夫詩也者，大半出於征夫游女，狂且怨婦窮愁之民之所爲，其所紀非盡聖賢之行事也，而又

不自聖人作之。不自聖人述之。而聖人又未嘗謂若者可若者。不可。若者是。若者非是。而爲之論定之。讀之者。忽以其心爲征夫游女焉。忽以其心爲狂且怨婦焉。忽以其心爲窮愁之民焉。若以爲征夫游女。狂且怨婦。窮愁之民之上。又有一聖人立乎其前。有一聖人之意行乎其內。則讀之者。忘之矣。而吾謂此其不可忘者也。忘之則詩非經也。古未有征夫游女。狂且怨婦。窮愁之民之所爲。而可以爲經者也。詩之所以得爲經者。自不在乎征夫游女。狂且怨婦。窮愁之民之中。而又不出於征夫游女。狂且怨婦。窮愁之民之外。是可卽刪之一言以蔽之耳。一言維何。曰思無邪。蓋思之本然。有善而無惡。故讀令德而知其褒。讀淫亂而知其刺。詩人不自言其意。而無不相喻者。率性之道也。人心之詩也。思之當然。善善而惡惡。故因其褒而令德明。因其

刺而淫亂止。詩教不更言其故。而無不自得者。反情之學也。先王之詩也。以人心之詩。行先王之詩。是以人心之善。無所緣則易沮。忽於詩。遇我心焉。不意如是之纏綿而無遺也。豈惟無遺將我心所未有之善。亦旁推曲引而達之矣。人心之惡。無所鑒則易藏。忽於詩。發我心焉。不意如是之淋漓而難拚也。豈惟難掩。將我心所未知之惡。亦充類比醜而盡之矣。其所以能達且盡者。孰使之。詩使之也。則非詩之能使之。思之無邪者使之也。而聖人已立乎其前。而聖人之意已行乎其內矣。明此者。不必執詩之爲善而後感。詩之爲惡而後戒也。帷房哀怨之辭。孤臣孝子。引爲至性之事。昆蟲瑣屑之理。達人哲士。得爲悟道之原。六卿之餞韓宣也。蔓草同車。百拜而廢晏饗之重。季札之觀魯樂也。邶鄘及衛。三歎而頌周禮之令。如必孰善而後感。孰惡而

後戒也。穿鑿附會之說固其思而無邪云乎哉。此讀詩法也。

子曰道之以政章

兩節平舉。語意歸一。優劣善否。瞭然難混。朱子恐後人遂偏廢政刑。故于圈外說曰。謂德禮中原有政刑。聖人只爲第一節專用政刑。乃不可耳。朱子所云不廢者。正德禮之政刑。非專用之政刑也。論者動云不可貶政刑而尊德禮。是欲將專用政刑者周旋先與聖言相刺謬矣。豈朱子註意哉。又論文必須平列兩種。不下褒貶。令人自辨爲妙。皆是胡說。免而無恥。有恥且格。褒貶彰彰。如何從新要含糊起來。

夫子兩下斷語。一善一否。判然分明。正欲後世擇術者知所趣舍耳。如何偏要兩下含糊。不直斷是非爲妙。其意似反欲周旋政刑一邊者。此等評論。俱從小人胸坎流出。非小小語病也。

首節

文選春秋時所謂政刑。尚是太公之治齊。非後來申商比也。子產之於鄭亦如是。**註**看朱子圈外總註。政刑德禮原俱指先王所以治天下者。故曰不可偏廢。但爲偏重政刑而不本之德禮者言。若專重政刑。則雖先王之政刑亦止得免而無恥。故政刑不但不是申商。并非太公子產之所爲政刑也。題義本如是。乃鄭鄭謂政刑不甚說壞。方是正始元音。其意似當時重政刑。必要周旋以爲吉祥。真小人之心也。總不會曉得政刑原不是不好底耳。

道之以德節

德禮在先。政刑在後。德禮爲本。政刑爲末。古今理勢之必然。聖人分別兩者得失淺深。原爲專用政刑者而設。故次第說入耳。時

文便講做政刑後商量變計。直是可笑。

云云。于政刑弊病相關儘見明切。說至德禮道齊實際却無把鼻。何也。緣其于德禮二字源頭有差處。看德字其高入于虛玄。而外不過慈悲廣大。看禮字只成聖人作用。不是天命內事。此其所以無把鼻也。

禮因德。德因天。**禮**亦天也。

齊之以禮。却又有本有用。

道之以德。貼身先說是禮。却不可專指君身上。

禮此德禮指在上本身說。德訓行道有得合身心言。如其身正不令而行意。禮卽行事中正之矩。道立于身而道之齊之以此。若但說教民爲善。則伯者躬行雖闕。何嘗教民爲惡。仍是道之以政矣。禮偏指五禮。則只是教民習禮矣。禮卽德中無過不

及之則而散爲數度者。如云德道未能。又須禮齊。如此則禮之效深。而德之效淺矣。德固禮之本也。**註**此章原爲治法分辨本末。不重責君身意。若正身而民化。又別一話頭。此章道齊二字原專指教民說。但德道指君之躬行倡率耳。禮便是制度品節之及民者。故曰齊。若謂禮亦在君身行事看。則仍是道之。非齊之也。**註**中固字又字。次第甚精。此又字。與又多能也又字同例。是加詳。不是推深。止分本末輕重說。非禮深而德淺也。政道不從。又須刑齊。德道未一。又須禮齊。文義自明。合論之。德禮爲政刑之本。分言之。德又爲禮之本。非謂齊深于道也。道**註**先之。齊**註**一之。是兩節通訓。故不特德道是率先。卽政道亦是率先。伯者治國。亦必身自行法示信。卽所謂道之以政也。但伯者率先。只在紀綱法令。與王者之率先。只在仁義孝弟。此爲不同耳。不

可因伯者之教民亦以善而謂王者只躬行未嘗教民也。

文開更習不偷萬姓素朴。素朴非德禮之治效乃老莊太
上語耳。

子曰吾十有五章

聖人終身只得一個學字數件止是學中境界。人只將下半截逐
段敷揚。便似孔子別無甚事。倏忽過却十年。到彼時突地如此
不知聖學原無一息之停刻。刻有日新處。數者只就十年大段
舉个名目教人耳。

到底。是學。聖人立言本義。
循序漸進。聖人身教大意。

歸。道無終窮。雖聖人亦有待于學也。學之則不容無漸矣。
此其理之固然而豈聖人過爲卑論以就天下也哉。學雖聖

人必以漸。足破千古頓悟之說。頓悟者。和尚之道也。

聖學以漸而成。非有詭于人也。政其不息者難耳。謹道著。

聖門總無頓悟之法。和尚家有一宗。各有一樣啞謎。要人猜著。猜著便無事。故有頓漸之說。聖人之道。做到老。學到老。假我數年。卒以學易。活到八十九十。又須有進候。不同處。總無頓悟事也。或曰。然則生知者非歟。曰。生知者。知之易。不喫苦。如所謂聞一以知十。聞一以知二是也。非謂定不須學也。且如孔子問禮學琴也。須從人問學來。但到手容易。默識心通處。不同於人耳。聞韶三月不知肉味。是怎地用功。何曾一聽便了悟哉。

六箇而字。字字有功力。有火候。有意味。

而字說得不容易方得。

年歲中有實際工夫。

聖人工夫只一片去。到十年獨覺得火候一變耳。如元氣流行。不見他那一日換却寒暑。然四時之正自禪。

聖人止是一路做去。純亦不已。不是過十年。另換一番工夫。也不是無思無爲。忽然又開一樣境界。

道理境象。循節相生。後十年消息。已在前十年做透。前十年見處。却與後十年不同。與邪門忽摸著鼻孔。又道鼻孔原來向下。總沒交涉也。

聖學不已。遂時有進境。六段亦就中提出个大節候耳。不是憑空過却十年。忽然摸著鼻孔也。

熊龍文夫子蓋隱其學之徹始徹終者。而言其積累者以教人也。**謙**吾無隱乎爾。志學便是徹始徹終事。聖人言語。句句真實。

凡所謂謙辭亦是後儒推原而言。若說聖人有意作謙便有弊病。況有所隱乎。程子所謂聖人未必然。朱子所謂固無積累之漸。是指聖人生質而言。言其生知安行。于所謂志學立不惑等不大段吃力界畫定做耳。不是說聖人別有一種易簡道理。直捷工夫。祕而不傳。而故立此節目。爲下乘說法也。惟禪門有兩種接機。姚江竊之爲天泉證道云。無善無惡。心之體。有善有惡。意之動。知善知惡。是良知。爲善去惡。是格物。這話頭爲其次立法的。若接利根人。則心意知物。總是無善無惡。本體工夫。一悟盡透。如彼之言。原有兩道。故有隱有示耳。聖道決無可隱。知行分配。說本朱子。然朱子謂志學一面學。一面力行。而以知爲重。立本於知。而以行爲重。則知行原十分畫開不得。朱子因門人問如何分知行。故隨問答之。非此章一定之分限也。

此章是聖人自敘最難下語。節節要說得切實。切實處須見得聖人分上高妙。高妙處又須道得語氣尋常。數者缺一。便不成此章說話。

此題所難。以夫子口氣寫自己地位。道理說低了。不是聖人分上事。要說聖人道理。分明自作讚頌。所以難也。時作大約通犯此病。講到末節。多說窮神入化。學成德全。他竟不許孔子再活到八九十去。尤可笑。

首節

志學是徹始終事。

陳際泰文丘固已不安于此也。然于學特有其志耳。**評**看得恁輕耶。始條理者智之事也。

志學時便有此矩在。

志於學三字。拆舉不得。拆講便有病。拆學字貫下尚可。有以志字貫自謂與心字關會。此大謬也。立不惑知順欲。那一字不是心耶。

四十而不惑節

熊伯龍文學至四十。心通于萬事。而所擇者明矣。**評**擇是志學中事。

工夫吃緊在前三節。雖聖人生安。於此想亦煞用力來。到知命以下。只是涵養充積去。用力一節輕一節矣。

五十而知天命節

是先有這件家伙在。知天命只是曉得這家伙來歷耳。若先不認得這家伙。更問甚來歷也。

龍章文論天理之流行。性命本安于各正。顧功力未深淺之而流

于數者。深之或入于幽。**註**解此纔見堯夫加一倍法。程子不屑爲也。**文**卑之而滯于迹者。高之亦遁于虛。**評**釋氏彌近理亦在此處。又不可不辨。

六十而耳順節

洪圖光文五十而知天命。尚有聰明之未淡也。**評**耳順正是聰之至。如何是淡。要淡聰明。卽非聖學。

七十而從心所欲不踰矩節

說个不踰矩。可知聖人心中。刻刻有个天。則在。不是卽心是道。此本天本心之別。卽程朱之所謂主敬也。時文只做得從心所欲。便墮本心之學。不是聖人之道。

聖人之學。性天之學也。自古無學心之說。有道心。便有人心。故心不可爲學也。學所以正此心耳。直指人心。見性成佛。學其所學。

非聖人之學也。故凡言心學二字。卽是爲邪說所惑亂。彼只要歸于無善無惡耳。聖人說箇從心所欲。重在不踰矩三字。矩者何也。性也。天也。至善也。心與性天合一。方爲至聖。方是聖學。可知心上面更有在。故謂聖學都在心上。用工夫則可。謂聖學爲心學則不可。

陳際泰文。吾人立身之道。以規不若以矩。評拈个矩。便生規。秀才粘皮帶骨。不可著話頭如此。

孟懿子問孝章

從懿子不再問中。便見其錯會。纔得聖人第二節用處。

孟武伯問孝章

不說人子之心。而反說父母之心。此是對照語。只說父母之心如此。又不說人子宜如何體父母之心。此又歇後語。其辭氣極活。

極冷。惟活也冷也。纔刺入人心裏去。

人但做得憂其疾。則一謹疾。便是完孝矣。惟長幼出入知愚貴賤。凡無疾之時。皆父母所憂之時。此所謂疾之憂。所謂惟其疾之憂也。程子謂武伯其人多可憂之事。正見此義。

子夏問孝章

色字有率任之非。有文貌之非。

不說色應如何。應如何便有模擬。可模擬便未爲難矣。隨時易地。其道無方。舜之齋慄。有齋慄之難。老萊之嬉笑。有嬉笑之難。中有一分孝。外便有一分之色。自然流露。無可掩著。難處原不在色。不在色。色之所以難也。

根心生色。不假貌爲。然則真樸者。其色無難乎。此又有說。溫寶忠母夫人舉此句爲訓曰。性急人烈烈轟轟。凡事無不敏捷。只父

母前一味自張自主氣質使父母難當性慢人落落托托凡事討盡便宜只父母前一副不痛不癢面孔亦使父母難當其言粗淺而有味色豈必出于不孝凡自以爲其心無它徑遂出之所傷已多皆此義也色固出於氣之和氣由於愛之深而所以能深能和則必天性學力並至而後有此此所云難也程子謂子夏能直義而或少溫潤之色須識此意

子曰吾與回言終日章

金聲文吾惟恐學者之直領吾言而漫以爲有得故吾言每引端而不竟發使自思焉使自疑焉云云從聖人用處看出不違妙有因緣然他却是禪門作用南公謂寶覺若不令汝尋究到無用心處卽吾埋沒汝**文**回亦何用違吾言耶吾但與終日言而已浩浩矣辨擊之下反未免失天機矣吾亦何庸吾自發耶

吾但得回之私而已畢教二三子矣。心精之出其實有不可磨滅者矣。**評**描寫法王接引方便與獅子兒脫轡擺柱處真是萬分精彩。要之于聖賢公案不曾夢見在。看他發揮亦甚警策。有甚麼脫謬處。曰。只是發一句道不著。其餘說玄說妙。一總不是如愚不愚。緊相呼應。呆看愚字。卽犯死句。然先說得如愚深一步。反與下段無情矣。

如愚二字淺放却深合。深求定謬矣。

如愚只是不違外貌。

題之要義。只在不違足發四字。如愚不愚。乃形容此四字耳。但摹取如愚不愚虛神。於聖人詞氣中添出許多嫵娜做作。便可笑。摹如愚不愚。則退省句。必多一番打點探聽做作。又說得聖人神張鬼智。悄冥窺覷相似。

退省只是實勘其所行耳。何消做作。

足發在身體力行說。不是在辨說上發明。

發謂日用動靜語默閒。皆足以發明終日所言之理。但謂言上發明固非。離却夫子所言而泛言發夫子之道。亦非語意也。亦字是驚喜詞。不是輕可詞。

須是顏子之足發。若曾子後來又別。

足發正見不達中默識之妙。非兩層也。

此題久在雲霧中。以如愚爲老氏之盛德若愚。以足發爲衆妙之門。而全抹去動靜語默之閒。發明所言之理之意。總由平日胸中無身體力行四字。處處走入玄虛。與聖賢大旨背反。不獨此一章也。

子曰視其所以章

聖人只論觀人之道當如此。若其所以爲視觀察者。煞有本領。是上一節說話。聖人未之及耳。故朱子引程子之言于圈外。蓋不見此理。但講視觀察。恐後人蹉入自私自用智之術。流爲機權作用。失却聖人所以觀人之本也。能體是解。極精刻處。正是極忠厚。方見聖人成已成物。智以行仁之妙。于程朱所以註脚之意。亦許君親見矣。

程子所謂知言窮理。是平日自做工夫。原不爲視觀察而設。然却是視觀察底定盤鍼子。或不改知言作知人者。便不通。三句正講知人。知言乃所以知人者也。知人是性之德。智之用。不是做工夫處。

張永社文要非違棄人於不肖也。要非輕諒人于中藏也。惟其不違棄不輕諒也。則衡鑒必詳。甄別務盡。**評**可知聖人許多法。只

完得一个仁字。**原**誠至明生。自是聖人事。下此惟詳慎二字。終身行之無弊耳。**評**或問朱子。聖人當不待如此著力。曰。這也。爲常人說。聖人固不用得如此。然聖人觀人也。著恁地詳細。若不教徹底分明。如何取舍。此等處。直是朱子道得盡。知人則哲。惟帝其難之。敷奏明試。三載考績。聖人如何委曲周到。也是道理。合如此。聖人未嘗不詳慎也。誠至明生。只在知言窮理上。省得苦工夫耳。

張邦祚文若此者可卽一事而徵之也。又可卽一時而徵之也。**評**一事而以由安皆著。于義無謬。然止是一說。不可以該全義。至謂一時而視觀察都到。斷無此理。視觀察也。須有次第。須知此章爲人論觀人之法。當詳細如此。不是聖人自誇其神鑒也。**陳子龍**文夫人既有當世之慮。則不可以不知人。**評**平居日用。便

可不知人耶。**文**世固有大奸不可忽也。**文**不必如此說自古以來理自如是尋常人物多如是。**文**人情日深鉤距日密雖聖人豈能坦然以遊世哉。**文**凡人情僞自上古至今日無異也聖人窮理盡性能知鬼神萬類之情狀其道固如是非爲末世奸嶮而聖人爲立鉤距之術也。視以觀由察安在唐虞三代前理亦爾。如所云聖人胸中先擾擾多機械危險矣何以能知人曲成萬物哉。且孔子時已世變易術如是更數千年將聖人亦相從爲魔怪耶。

子曰溫故而知新章

歸有光文君子之學其始也未得于吾心之理而有待于天下之物。**文**如此說則天下之物與吾心之理兩件矣。**文**其終也則不見天下之物而見吾心之理。凡其所以然之故與夫形而上之

道皆超然有得于意。言象數之外。**評**溫故知新。是日知其所未知耳。非故爲形下而新爲形上也。今日之新。異日又成故矣。**評**以物應物。而天下之物常無盡。必有所限而不通。以心應物。而天下之理無不足。隨取其心而皆裕。**評**以物應物。方不執一以格萬。以心。則限于物而不通矣。況溫故知新。亦不是。心與物之分。**評**人之爲學。以見聞自牖者多矣。君子之學。求諸心而自得焉。**評**說成兩開。便入心學邪門矣。故者所已知。新者所未知。都只在聞見中說。言因其所已知者而益加精詳。日知其所未知。非謂故爲聞見而新爲心悟也。猶之看書。初時所見猶屬皮膚。若能思辨不已。剖析精微。或悟前解之粗。或知他說之謬。或得向時未見處。或旁通於別義。皆所謂知新也。如此則可以爲人師。而講書辨難矣。註所云記問之學。無得於心者。猶之近日秀

才止曉得一本說約俗書。自以爲原本傳註。此以淺陋爲故而不知新者也。又有一種學究博考講章。如所謂蒙存淺達者。以至於大全。則自以爲無所不知。而究於聖賢之旨。不知其所歸。所謂蒙存淺達之迂譌。大全之踳駁。不能辨也。此以博雜爲故而不知新者也。又其甚者。造撰新奇之說。離叛傳註。如袁黃之改註。葛寅亮之湖南講。及說統說叢等。此又以謬妄爲知新。而非聖人之所謂新也。凡此總因四書之理。無得於心。而徒爲講章記問之學故也。非謂四書傳註之外。別有所謂新者。當舍傳註而求之心也。且聖人明言溫故而知新。則新原只在故之內。知之得力。原只在溫之內。如所云。則當云棄故而知新矣。況故非障誤。新亦非止境。今日之新。明日卽爲故。豈可以新故分物與心形上與形下手。先生此篇理謬不小。而人皆未之知也。恐

誤後人不得不辨。

故自藏新。新原是故。只是一件事。

必知新乃見溫故。用力却只在溫故。

中庸溫故知新。作兩節看。此只作一節看。新從故生。必新生而故爲實得。

子曰君子不器章

不器。不是不能器。無器不備。其本領不關器。不可以器求之。限之耳。無所用者。非不器也。君子有時以一節見。如治水稼穡掌火。明刑之事。似有專長。然而不器也。

黃淳耀文氣象之偏全。至相遠也。所就既卑。則雖慕爲一時秀傑之才。而已覺其難至。所積既厚。則雖加以生民貴美之譽。而亦有所不居。**評**今日眼中。但得時貴庸流稱許。已過望矣。故曰士

先器識。文。君子之應物也。無成心。一官一曲。惟朝廷審命而與之。功見名成。遂以爲適宜。此任而不知其餘地之恢恢。評。後世論人。但從其迹。故學問轉入功利去。不知古人雖成大功。其分量原不在此。

不字須放在器字上看。又須放入器字中看。乃得其全。人但見得器字外耳。

小成之士。正好從器上用工夫。

子貢問君子章

先行句。是現成指點語。是論君子。不是論言行。

先行句。卽落箇其言。則其言非泛指辭說。卽所知之事理也。若云我所知之事理。必躬行有得而後可見之言。八字只一句說。行其言。只指一件。與別章重行慎言之義不同。別章言行平對泛。

說故行字去聲讀此只是一片說故是平聲字

陸龍其文自記此章比顧言顧行訥言敏行較深一層**評**其言乃所知所得之事理也不就做一番言語說過必先身體力行步步著實而後說出來行其言三字拆開不得拆開則行字是去聲而非平聲去聲是對待字平聲卽在言字上見故比他處平舉之言行較深一層也但作言行先後則其言從之四字都無著落

先行後從原不是謹言道理。

其言非有聲之言言之事理也行非德行之行踐其事理之實也故行其言三字拆說不得提其言二字作主而以行從分看先後其意自明但將言行對看便失之矣。

未有言時先有其言之理在。

是因其言而思其先行後從。

意固重行。而語實爲言而發。對子貢病也。看下箇其言字。則言之理已在。前矣。

其言非言也。從之乃言耳。以今日論君子。只有其言在。所謂先行後言之意。不可得而見之。在君子當日。亦必空中先有箇其言在。方去先行後從耳。只泛然做得一篇先行後言論。不先安頓得其字在前。便先提言字。後出先行。總不著痛癢。皆坐看書無眼也。

先後。是君子終身刻刻如此。

從之。是從其行。非從其言也。又須知是從字。若竟以言字代之。便無意味。

而後從之。是合上語。非對勘語也。

而後從之。是到此自然流出。非爲此兩先行也。

金聲文自記

子貢居言語之科。夫子此語。專伸起行邊耳。**評**祇是

眼前所見事理。其未體諸身也。曰其言。舉而見之實事。曰行。其言及其宣之口耳。曰而後從之。然則其言非言也。行其言非專指行也。總是此理顯藏次第分名。究之只要完得此理。實有諸已。以喻諸人耳。若云專伸起行邊。却須先有其言在。而行之。又早言伸在前了也。宗門人要。去事理障。先不要有其言。看得行是。運水搬柴作用。言是語句文字義學。打合不上。強分輕重。只爲其言上無是非。故行處全無義理。直謂不會有所行可也。

子曰君子周而不比章

錢禮文

宅心廣大者。容保與覆載同寬。私意之未克。而違言與人

難矣。

評惟君子故能周而不比。私意未克一語。得其要領。**文氣**

類之合。其中有天。君子不拂其天。則宇宙之渙可萃也。事非無
隆殺而隆殺以公。不以私。則無一人而不得其所。**論**此理須從
西銘得來。周字中分寸越精詳。氣象越廣大。

陳際泰性孤峻者之不能周。猶之性寬裕者之不能介也。**論**不
是此理。伯夷性孤峻。却正周而不比。柳下極和。却不以三公易
其介。何言不能介也。**論**吾人之事。以周而始。以比而終。**論**不必
論前後。周卽始終。周比卽始終。比其根原不同也。

萬曆以來。門戶之爭。害人家國。只消一比字耳。祁虎子問一門戶
要人于東林鉅公。曰此君子也。將薦矣。問于山陰劉念臺。曰此
小人也。遂劾之。天下稱其公直。鉅公亦長者也。然未免比矣。如
念臺先生。其庶幾焉。而虎子能信山陰而不顧門戶。亦不可及
哉。後人猶以山陰爲東林。此門戶人引以爲重耳。其實不然。

子曰學而不思則罔章

不思則罔。如秀才記誦一生。於身心世務茫然無知者多矣。不學則殆。如良知家作爲顛倒。善知識窮兇極惡。皆只爲打掉了窮理工夫。

歸有光云。爲之思以求其心。**評**思以求心。是騎驢覓驢也。思以求其理耳。

楊云。學而不思。學乃爲累矣。**評**學無益耳。何至爲累。**文**風雅求其恒典。謨求其質。有可直闕以明君父之爲尊者。特其慎思之所及。不可爲未學者道也。**評**不思之人。猝乍有所得。便自以爲是。必不肯並存闕疑。乃所以罔也。但闕亦不止爲君父之尊。**文**學之迹。皆其顯聖而托奸者也。宇宙大矣。豈無以所學欺天下者乎。**簡**學謂講習之事。凡一技一業。世務云爲皆是。讀書不

過其中一事耳。今只將讀書二字蓋殺學字。將學字已看得不好。遂謂學足以欺誤人。此自己見識粗。却反誣了道理也。卽就讀書論。亦不止爲君父治亂。雖日用細微。如灑掃應對進退。造之可至聖人。若不思。則連此事不得其理。所謂終身由之而不知其道耳。徒說大話。亦屬粗見。

子曰攻乎異端章

章句 天下之事。伐異者害之也。彼自非矣。安用以是而攻。非且是亦多途矣。又安用以是而攻。是**歸**道一而已。豈有兩是。攻治之攻。改而爲攻伐之攻。其義水火矣。要使天下無是非。混同異。是何心乎。

子曰由誨女知之乎章

此章須作四層洗發。首句空說箇知之道。一層知之不知。是女字

中所自有一層。爲知爲不知。是能不自欺。一層。末句就指不自欺處。卽是首句。知之道。一層。故首末兩知字。總說是一樣。而有虛實。中四知字。上二字是自己見地。分現處。下二字是不自欺。細看來六字。字字不同。許東陽謂中四字。指一事之知。猶覺籠統在。

講章謂子路以不知爲知。實坐不知。非曉得不知而飾爲知之。此却與註意不合。蓋好勇之賢。乍有所見。主張到太過處。一冒過去。便是自欺。故朱子引正名一節。便以孔子爲迂。和那知處也。不知了。證得最明。子路豈不知孔子之不迂。只要主張名不能正太過。致此蔽耳。講章之誤。在一飾字。飾者不肖之自欺。強以爲知。賢者之自欺。自欺亦有粗細之分。然總爲自欺。則于理蔽一也。

子路病在過火。其不知却正在此。朱子所謂知與不知。終無界限。和那知處也不知了。非不及冒昧一流。

知之不知。是不自畫處。蓋知之不知。就事理上說。纔見得有知有不知。便自畫不得。爲知之爲不知。是當下心上不欺處。不終于不知意。貼知之不知。卽此是知意。貼爲知爲不知。是字直指上兩爲字。不指知不知。所謂無自欺之蔽也。

自欺之蔽。一則蒙昧不自察。一則雖覺而強蓋過去。知之不知。則能自察矣。爲知之爲不知。則不強蓋矣。是字直指當下。由此而求其可知之理。朱子補圓道理如此耳。人謂不補爲高。則又隆萬後叛註之論。

聖門說知。便指義理。不指心體。但心有自欺之蔽。則義理障拒而不明。所見皆成謬妄。能去此蔽。則義理易明。天下未有知其不

知而肯終安于不知者也。故朱子由此而求之一轉。正圓滿是知中道理。非于是知外添蛇足也。惟邪教之所謂知。則專指心體而言。但本體一明。大事了畢。當下卽完全無欠。若更加擬議。便于本體有礙。此良知家之精蘊也。故李石麓戊辰主試。極詆集註。由此而求之一轉。而袁了凡讚歎以爲程文不依註。千古絕唱。自此以後。說書論文者。無不奉其說爲至善。本領一差。不自知其惜。騰流轉于狂禪。而尚自沾沾寶護。以爲聖學固如此。不大可哀也哉。要知此理畢竟殄滅不得。

子張學干祿章

首節

干祿不是不講言行。是另有一種動人之言行。

子曰多聞闕疑節

寡尤悔。統承三節工夫。時文說來。止跟著慎言行耳。

兩段寫出一片兢兢勿勿。鞭辟向裏。只求免尤悔之心。通身氣力盡注到則寡二字。方得聖人語意。寡者尤悔未必無也。則寡者如是用。力而後僅得寡也。

兩則字是未了語。

兩則字是難詞。

或問子張學干祿。夫子以祿在中引之。如何反作難詞。曰。祿不須干而自得。是下三句中語意。此兩段却正說寡尤悔之難。看兩則字。如何鄭重。子張才高。務外。直看得言行不打緊。夫子說寡尤悔之妙。以引之。却正不許他兩寡字容易也。

學者求道。與庸鄙人求利達。其用功深苦一般。但所求之物不同耳。譬之作好文字。與俗下醜派。其用功深苦也。是一般。未嘗好

文難而醜文易也。但掉轉肺腸便得耳。

章靜宜文。凡人之心不可使之暇也。暇則必有意外之想得而入之。**評**閒字最是學者大患也。只是不志于道耳。

言寡尤。疊二句。正難之也。不是過渡閑文。

二疊語。正是難詞。不是慰幸詞。

言寡尤二句。寡字說刻苦有得已。不同上寡字。

言寡尤行寡悔。此亦復上起下過脈題也。而有異。凡過脈卽上文疊述無層次。此題却與上有層次。上兩寡字。言如此然後寡。未全寡之詞也。此二寡字。是果成其爲寡。較進一步。

在中。只在寡尤悔看取。

金聲文。卽莫窮莫殫。真有數奇之時。此數奇也。天不之與。安知善于者。至此亦不廢然返也。曷若存其真至之性。以自立于學問。

之地而後見吾不朽之學自在祿外。**評**聖人云樂亦在其中可知學亦不必說在祿外。但意不在祿耳。在中但就理上說。不論時節因緣。于此欠精細。便有信不過處。在其中但指上兩段。乃切實事。又尋向上一層。如存其真至之性云云。于上兩段上面添出綱宗。是看得寡尤悔還低在。便有蔑視祿字意。于世間一切法都不涉。轉說遠去。不涉聖學了也。

在中則已有得祿之理。其或不得。命之不可知也。干祿則已失得祿之理。其或得之。亦命之不可知也。枉爲小人。而不免於坎壈。枉爲醜文。而不售於場屋者。不知凡幾也。

祿原不是學問分外事。所誤在干耳。在中者。道理如此。學者未嘗計及。亦不必計及。應固在中。不應亦在中。

陳際泰文

祿不求而在。是天下之所爭趨也。**評**也不可著此意文。

一定之時命。與一時之骨法。不能自更。評有子平五星。又有揣骨相法。直恁粗雜。看大士一肚皮塵糟見識。只消一箇麻衣果老打鐵鉸和尚。足以動之矣。才士只如是。何處更講學問也。祿在其中。亦祇可口頭說紙上寫耳。夢寐中畢竟信不過在。

祿在其中。不是引誘庸流。亦不是鼓勵修士。是天地間自然正理。故弁競與枯遁者。雖清濁不同。而其不知道。看得一祿字重滯。則一也。

古人鄉舉里選。故說箇言行。如今秀才祕訣。却是醜作文。低立品。祿在其中矣。可笑可歎。

季康子問使民敬忠以勸章

康子只是私心。夫子純說天理。只合自盡其道。

同一物也。相讓則見多。相爭則見少。同一理也。責人則兩失。自盡

則兩得。夫子立言。原只煞重在上半截。敬忠以勸。就康子言之耳。然卽此便見此理之公。有感必有應。只要點破康子私心。若謂兼講功效。便是巧于計較者也。

孝慈兩件。須一齊有。民方忠于己。朱子說如是。非臆撰也。

舉善而棄不能。便不盡勸。朱子此語。正爲舉教並重。非爲教重于舉也。

子曰人而無信章

黃淳耀文人遊三代之世。而推誠相與。然諾不欺。彼蓋以爲道固然也。亦何嘗逆計其事之可濟。而後出于此哉。**評**論行不行。已是第二義。**文**自夫人有速求濟事之心。則其詐必至無所不爲。自夫人有無所不爲之心。則其術終于一無所濟。君子旣傷其譎。又病其窮。**評**二語兼盡。**文**一行敗而百行盡。屬可疑。片言虛

而千言盡爲飾說。**證**方見不知其可。不獨一言一事之礙。

子張問十世可知也章

子曰殷因於夏禮節

殷因於夏禮。周因於殷禮。正是答知來。不是徵往。

子張欲知來。夫子只以知往者推之。知來求其變。知往只求其不可變。不可變者其大。而變者其末也。故兩段只重因邊。不重損益。

唐順之文如三綱之正。五常之敘。雖曰肇修人紀。而實則繼禹舊服者也。乃若因其時異勢殊。而損益以合其宜者。不過易尚忠而尚質。易建寅而建丑耳。凡此皆著之簡策而昭乎其具在者。不亦可知也耶。**評**或云。損益句須拈二所字。包括甚廣。非專指質文丑子而言。可知。正謂損益之理。原非沾沾就簡策中索解。

此文實有未盡處。其說苛而無當。看他用如字。乃若不過凡此等虛字。則包括甚廣之意。自見。原未嘗偏枯執著也。可知。指商周之禮。若不從簡策考訂。卽損益之禮。何據而知。觀聖人自謂能言夏殷之禮。而病於不足徵。亦可見矣。此種議論。總欲叛傳註而談虛玄。薄文字而憑心悟。非小小語病也。

文南英文 一代之治。必其綱常人紀旣敗。而後國隨之。其從而復之者。雖變也。而實常也。**評**見因革損益。只是一理。**文**乃一變而至秦。所因所損益。俱不可知。何也。然其君臣父子之閒。三綱淪而九法斁。不旋踵以亡。惟所因而不因也。**評**秦之亡。正見可知。**文**罷侯建守。所損益者。後世反由之而安。則未始不可知也。**評**後世由之而不安耳。

百世可知。只是殷因於夏禮。所損益。周因於殷禮。所損益耳。邵子

一部經世書。總不出此圈襍裏。

理數原不可分析。然畢竟以理爲主。無理則數亦難算矣。識緯家只見一邊。故有驗有不驗。聖人上下千年。直如著衣吃飯。具此識力。便可衙廡皇極經世。程子所謂某知之。堯夫不知也。

子曰非其鬼而祭之章

見義不爲節

不爲之根。總在利害上起腳。凡人于利害分明。其氣便餒。故聖賢只在是非上斷定。不講利害。則無欲。無欲則其氣浩然。所謂仁者必有勇也。

呂子評語正編卷五終